



Svijest vjernika o Allahovom nadzoru (Meka)

Hatib: dr. Fejsal ibn Džemil Gazavi

17. džumadel-ula 1445. god. po Hidžri / 1. decembar 2023.

Hvala Allahu, Onome Čije je sve na nebesima i na Zemlji i između njih i što je pod zemljom, Poznavao nevidljivog, "Njemu ne može ništa, ni trunčica jedna ni na nebesima ni na Zemlji, izmaći" (Saba, 3), On poznaje tajne Svojih robova i ono što u javnost iznose i zna sve što rade. Ništa Mu od Njegovih stvorenja nije skriveno. On ih obuhvata Svojim znanjem i dopire do njih Svojim pogledom. Njemu će se vratiti. Svjedočim da nema boga osim Allaha Jedinog, Koji druga nema, Poznavao tajnog i javnog, i svjedočim da je naš prvak i vjerovjesnik Muhammed, sallallahu alejhi ve sellem, Njegov rob i poslanik, neka su na njega Allahova milost, blagoslov i spas, i na njegovu porodicu i ashabe, i sve one koji ih slijede u dobročinstvu i idu njihovim putem.

O vjernici, bojte se svoga Gospodara u svim situacijama. "O vjernici, Allaha se bojte, i neka svaki čovjek gleda šta je za sutra pripremio i Allaha se bojte jer On dobro zna šta radite." (El-Hašr, 18) On, slavljen neka je, ima potpuno i precizno znanje o svim našim djelima, dobrim i lošim, i ništa Mu nije skriveno.

O muslimani, jedna od zastrašujućih stvari koje će se desiti na Sudnjem danu jeste da će tajna postati javnost, a skriveno poznato, kao što nas je o tome obavijestio Uzvišeni Allah u Svojim Knjizi: "... onog dana kada budu ispitivane tajne" (Et-Tarik, 9), tj. kada bude ispitivano šta je u ljudskim dušama, kad budu otkrivene tajne, i kad se iskrena vjera i namjera razluči od neiskrene, i otkrije suština svake stvari.

O vjernici, na Sudnjem danu, na licima će se pokazati ono što je bilo u srcima, dobro ili zlo. "... na Dan kada će neka lica pobijeljati, a neka pocrnjeti." (Ali Imran, 106) Ibn Kajjim, Allah mu se smilovao, rekao je: "Čija nutrina bude dobra, i njegova će djela biti dobra, pa će se to odraziti na njegovom licu u vidu svjetlosti, blještavila i ljepote,





a čija nutrina bude pokvarena, i njegovo djelo će pratiti njegovu nutrinu, pa će se to odraziti na njegovom licu u vidu crnine, tame i ružnoće."

O vjernici, naša je dužnost da razmišljamo o uzvišenosti tog veličanstvenog prizora, kada budemo polagali račun, i kada budu otkrivene tajne: "Tada će ispitivani biti, i nijedna tajna vaša neće sakrivena ostati." (El-Hakka, 18) To će biti ispitivanje pred Onim Koji poznaje tajno i javno, i Kome ništa, od onoga što smo radili, nije skriveno, naprotiv On je Poznavalac vidljivog, tajni i onoga što prsa kriju. Uzvišeni kaže: "Tu će svako saznati ono što je prije uradio." (Junus, 30) I kaže, slavljen neka je: "A zar on ne zna da će, kada budu oživljeni oni koji su u grobovima i kada izađe na vidjelo ono što je u srcima." (El-Adijat, 9–10)

U svemu tome poruka je svakom ko je ubijeden da ga Allah vidi gdje god da je, i da zna njegovu nutrinu i vanjštinu, ono što skriva i u javnosti iznosi, da već sad počne razmišljati o sebi, da se pazi nemara i grijeshenja, da prihvati razboritost i savjet, i da prestane činiti ono što bi ga moglo osramotiti na Dan kada se otvore registri i razlistaju knjige, i kada neće ostati ništa skriveno i kada izađe na vidjelo ono što je u srcima.

Ajet: "... onog dana kada budu ispitivane tajne" (Et-Tarik, 9) – jasna je poruka svakom izdajniku i vjerolomniku, jer će saznati rezultat svojih djela kada se pokažu tajne i razotkrije njegova izdaja. Poslanik, sallallahu alejhi ve sellem, rekao je: "Svakom izdajniku bit će podignuta zastava, i bit će rečeno: 'Ovo je izdaja tog i tog.'"

Ajet: "onog dana kada budu ispitivane tajne" (Et-Tarik, 9) – najveće je upozorenje i najjasnija poruka svakome onome ko se (samo)zavarava Allahovim oprostom i blagošću, a ustrajava u grijesima u tajnosti, i izaziva prezir i srdžbu Gospodara svih stvorenja, gubeći iz vida taj dan u kojem će tajne biti ispitivane i zastori uklonjeni. O ti koga je Allah sakrio, dok si činio grijehe u tajnosti, i nije te osramotio, ne predaji se nemaru, i čuvaj se, Allahov robe, ustrajavanja u grijesima, čuvaj svoje oči od gledanja razvrata i nemorala, i čuvaj svoje uši od slušanja onoga što je Allah zabranio, i sjeti se da će tvoje tajne, koje sada ne vidi niko osim Allaha, jednog dana biti razotkrivene. Poslanik, sallallahu alejhi ve sellem, rekao je: "Prepoznat ću ljude iz svoga ummeta,





koji će na Sudnji dan doći s dobrim djelima veličine brda Bijele Tihame, pa će ih Allah pretvoriti u prah." Sevban, radijallahu anhu, upitao je: "Allahov Poslaniče, opiši nam ih, otkrij nam ih, da ne bismo bili od njih a da to i ne znamo." Poslanik, sallallahu alejhi ve sellem, reče: "Oni su vaša braća, i od vas, ibadete noću, kao što vi ibadetite, ali su to ljudi koji, kada se osame, prekoračuju Allahove granice."

"... onog dana kada budu ispitivane tajne." (Et-Tarik, 9)

Kako je ovo samo velika opomena i podsjećanje onome koji je navikao na prevaru, spletkarenje i obmanul! Njegova sramota bit će otkrivena na Dan poniženja i sramote, kao što se navodi u riječima Poslanika, sallallahu alejhi ve sellem: "Ko nas vara, nije od nas, spletku i obmana vode u Vatru." Ovo je prijetnja i upozorenje onome ko ustrajava u prevari: spletku i obmana vrsta su prevare koje vode u Vatru.

"... onog dana kada budu ispitivane tajne." (Et-Tarik, 9)

Teško se svakom munafiku, licemjeru, i onome koji se pretvara i pokazuje u javnosti suprotno od onoga što skriva i taji! Najveća nevolja i najopasnije što će mu se desiti jeste kada njegova tajna bude razotkrivena i kada sretne svoga Gospodara na Sudnjem danu i kada budu "ispitivane tajne", tj. kada se otkrije i pokaže ono što je skrivao, i tada neće moći sakriti ono što je postalo očigledno i neće moći sakriti svoja loša djela i zle namjere. Uzvišeni kaže: "Oni se kriju od ljudi, ali se ne mogu sakriti od Allaha, a On je s njima i kad noću smišljaju riječi kojima On nije zadovoljan; Allah dobro zna sve ono što oni rade." (En-Nisa, 108) Ovaj ajet dovoljno je upozorenje ljudima koji imaju manjak stida i strahopoštovanja prema svom Gospodaru: sada se nalaze pred Njim, nema zastora, nema nemara, nema skrivanja, ostaje samo razotkrivanje i sramoćenje. On, slavljen neka je, upućen je u njihove tajne, i zna šta je u njihovim nutrinama, i na Sudnjem danu pokazat će se njihova djela i otkriti njihove tajne. "... na Dan kad će se oni pojaviti, kada Allahu neće o njima ništa skriveno biti" (Gafir, 16), tj. svi oni će se pokazati i razotkriti, ništa ih više neće moći zaštititi niti sakriti, a Allahovo znanje obuhvata sve: i ono što je javno i ono što je skriveno.





Allah je Svojim robovima naredio da ostave javne i tajne grijehе, kao što se navodi u Njegovim riječima: "Ne grijеšite ni javno ni tajno! Oni koji grijеše sigurno će biti kažnjeni za ono što su zgrijеšili." (El-En'am, 120)

Ovim ajetom zabranjuje se grijeh, i objašnjava da neko djelo ne prestaje biti grijeh samo zato što je skriveno.

Pod pojmom "ism – grijeh", u ovom ajetu, misli se na svaki vid nepokornosti i neposlušnosti prema Allahu, džellešanuhu, koji čovjeka čini grešnim, tj. navodi ga na grijeh i sramotu. I pored čvrste naredbe da se napuste svi oblici grijеšenja i žestoke prijetnje počiniteljima grijehа, veliki broj ljudi nije svjestan mnogih grijehа, a posebno grijehа srca, kao što su oholost, samodopadanje, rijaluk – pretvaranje u ibadetima, zavist, zloba, želja za popularnošću, zla namjera prema muslimanima, štaviše neko možda čini većinu ovih grijehа a da nije ni svjestan. Takvo stanje posljedica je zanemarivanja islamskog znanja i slabe vjerski svijesti.

Poslanik, sallallahu alejhi ve sellem, uputio je Ebu Zerru, radijallahu anhu, između ostalih, i ovaj savjet: "Savjetujem te da se bojiš Allaha u tajnosti i javnosti." Bilal ibn Sa'd, Allah mu se smilovao, rekao je: "Nemoj biti Allahov prijatelj u javnosti, a Njegov neprijatelj u tajnosti."

O vjernici, neki ljudi boje se da ih drugi vide u grijehu, a sasvim im je svejedno to što ih Allah vidi, iako će pred Njim polagati račun za sve što su skrivali i u javnost iznosili. Najpreče je da se Allaha boje i imaju strahopoštovanje prema Njemu. Ibn A'rabi je rekao: "Najveći gubitnici su oni koji ljudima pokazuju najljepša djela, a Onome Ko im je bliži od žile kucavice pokazuju najružnija djela." Neki učenjaci su kazali: "Možda čovjek sakrije od ljudi ono čime Allah nije zadovoljan, pa to Allah otkrije, makar i nakon određenog vremena, ili dadne da ljudi o tome počnu pričati iako ga oni nisu vidjeli dok je to činio, a možda ga taj grijeh navede na zlo koje će ga osramotiti pred ljudima, pa se tako otkriju svi njegovi tajni grijesi, a sve to da bi ljudi vidjeli da ima Onaj Koji kažnjava za grijehе."





Vjernik nastoji očistiti svoja djela i da ona budu iskreno učinjena u ime Allaha, svjestan Allahovog nadzora i bojeći se lošeg završetka. Ibn Ebu Mulejka, Allah mu se smilovao, rekao je: "Sreo sam trideset ashaba Allahovog Poslanika, i svi su se bojali licemjerstva za sebe." Hasan el-Basri, Allah mu se smilovao, govorio je: "Samo se vjernici boje licemjerja, a samo su licemjeri sigurni od njega." Ikrima ibn Ammar, Allah mu se smilovao, rekao je: "Muhammed ibn Munkedir rastužio se na smrtnom času, pa su ga upitali: 'Šta te je rastužilo?', a on im je rekao: 'Rastužio me ajet iz Allahove Knjige: 'A Allah će ih kazniti kaznom kakvu nisu mogli ni naslutiti' (Ez-Zumer, 47). Pobojavao sam se da ja budem od onih koje će snaći od Allaha ono što nisu mogli ni naslutiti."

Prema tome, vjernik je svjestan veličine i uzvišenosti svoga Gospodara, Koji poznaje njegovu nutrinu kao i njegovu vanjštinu, i Koji mu je blizu u svakoj situaciji, kao što kaže Uzvišeni: "Mi smo mu bliži od žile kucavice" (Kaf, 16), i stidi se da ga Allah vidi u onome što mu je zabranio ili da ga ne zatekne u onome što mu je naredio.

Zatim, znajte da vam je Allah naredio da donosite salavate i selame na Njegovog Vjerovjesnika, pa je rekao u mudroj Objavi: "Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljite mu pozdrav!" (El-Ahzab, 56)

Allah podario blagoslov meni i vama u časnom Kur'anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijeha, a tražite i vi, On mnogo prašta i milostiv je.

